

**Khalid tunggu arahan istana lepas PAS, PKR, DAP kemuka calon
Malaysian Insider
Sept 3, 2014
OLEH JAMILAH KAMARUDIN**

Menteri Besar Selangor Tan Sri Abdul Khalid Ibrahim meminta semua pihak bersabar sementara menunggu istana memberikan maklum balas cadangan calon menteri besar baharu yang diserahkan PAS, PKR, dan DAP.

Khalid berkata, pihaknya dimaklumkan ketiga-tiga parti selesai menghantar nama calon kepada Sultan Selangor seperti yang ditetapkan istana iaitu selewat-lewatnya hari ini.

"Saya percaya proses seterusnya akan menyusul dan istana akan memberi maklum balas.

"Sehingga proses selesai pentadbiran negeri akan berjalan seperti biasa di bawah Majlis Mesyuarat Kerajaan Negeri (MMKN).

"Harap semua pihak bersabar dan membenarkan proses dijalankan mengikut Undang-Undang Tubuh Negeri," katanya selepas mempengerusikan mesyuarat exco di Bangunan Setiausaha Kerajaan (SUK) di Shah Alam, hari ini.

Ditanya sama ada beliau tahu siapa calon terbabit, Khalid berkata beliau tidak tahu menahu dan enggan mengambil tahu calon yang dikemukakan tiga parti Pakatan Rakyat (PR) itu.

"Saya tidak boleh terlibat. Dalam perkara ini saya tidak terlibat kerana ada kepentingan, lebih baik saya hanya diberitahu tentang keputusan," katanya yang menjangkakan maklum balas daripada istana secepat mungkin.

Beliau juga berharap calon penggantinya mempunyai kriteria pemimpin yang berkualiti termasuk menjalankan program, projek pembangunan dan bekerja lebih keras memajukan negeri.

Khalid bagaimanapun enggan mengulas desas-desus kemungkinan berlakunya pilihan raya negeri jika proses pencalonan nama penggantinya masih menemui jalan buntu.

"Terpulang kepada budi bicara Sultan. Saya tidak mahu komen kerana akan timbulkan spekulasi.

"Keutamaan adalah mencari pengganti menteri besar yang ada sekarang," katanya.

Sultan Selangor sebelum ini menetapkan 3 September sebagai tarikh akhir bagi PKR, PAS, dan DAP memberikan nama calon pengganti Khalid.

Walaupun baginda menetapkan sekurang-kurangnya 2 nama, PKR dan DAP menegaskan hanya akan menghantar 1 nama saja iaitu Datuk Seri Dr Wan Azizah Wan Ismail kepada istana.

Sementara itu, mengulas mengenai perjanjian penstrukturan semula industri air antara negeri dengan Putrajaya, Khalid berkata perjanjian kini berada di peringkat akhir dan akan dimeterai selewat-lewatnya minggu depan.

"Ia termasuk pembelian Syarikat Pengeluar Air Selangor Berhad (Splash) melalui Akta Industri Perkhidmatan Air (WSIA) 2006," katanya.

Timbalan Menteri Tenaga, Teknologi Hijau dan Air Datuk Seri Mahdzir Khalid pagi tadi mengesahkan Putrajaya akan menandatangani perjanjian jual beli air bagi membolehkan Kumpulan Darul Ehsan Berhad (KDEB) mengambil alih syarikat konsesi air Selangor.

Mahdzir berkata, beliau berharap krisis menteri besar di Selangor tidak akan mengganggu perjalanan urusan penstrukturan air di negeri itu kerana ia merupakan kepentingan rakyat.

"Apa pun keputusan di Selangor kita hormati, tetapi keutamaan kerajaan negeri adalah rakyat.

"Kita tidak cakap soal PAS, PKR, DAP, kita cakap soal kepentingan rakyat Selangor.

"Berilah ruang kerjasama kerajaan pusat selesaikan isu air di Selangor, Kuala Lumpur, dan Putrajaya," katanya. – 3 September, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/khalid-tunggu-arahan-istana-l-epas-pas-pkr-dap-kemuka-nama-calon-mb#sthash.Q50SeRhQ.dpuf>